



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
27 Novembru 2024

Polítika Rekonsialisaun tenke reflete prinsípiu justisa no respeita ba ordem konstitusionál:

Eurico Guterres sei matein nu'udar akuzadu ba masakre sira iha períodou antes no depois referendum iha Timor-Leste

Polítika rekonsialisaun ne'ebé Prezidente da Repúblika no Primeriu-Ministru promove tenke reflete prinsípiu justisa no iha norma obrigasaun Konstitusionál sira ne'ebé konsagra iha Konstituisaun Repúblika Demokrátika Timor-Leste (K-RDTL).

Iha Artigu 160 K-RDTL defini katak krime sira ne'ebé kometidu hosi 1974 to'o 31 Dezembru 1999 konsidera nu'udar krime kontra humanidade, krime jenosídiu ka krime funu; fó-fatin ba prosedimentu kriminál iha tribunál nasional no internasionál. Ne'e signifika katak krime sira ne'ebé akontese durante períodou 1999 iha ámbitu konsultasaun-populár ka referendun sei prevalese ba prosesu julgamentu durante seidaun iha alterasaun ba Konstituisaun.

JSMP fiar katak provizaun Artigu 160 K-RDTL nu'udar ordem no mandatu konstitusionál ne'ebé vinkula entidade estadu tomak no tenke respeito, inklui Prezidente-Repúblika. Até Prezidente-Repúblika maka iha papél boot liu iha estadu ida-ne'e atu defende no ezije entidade hotu-hotu kumpri prinsípiu sira ne'ebé konsgra iha K-RDTL.

Eurico Guterres (EG) nu'udar autór xave no determinante iha violasaun oioin, atosidade no masakre sira iha Timor-Leste antes, durante no hafoin referendum iha tinan 1999. Tanba ne'e unidade krime grave ONU akuza EG nu'udar autór ba krime kontra humanidade inklui omisídiu, persegisaun no hahalok kruél dezumanu sira seluk.

“...Até agora, Eurico Guterres sei konsideradu nu'udar akuzadu ba aktu atosidade no krime kontra humanidade ne'ebé akontese durante no hafoin referendu iha Timor-Leste iha tinan 1999 no to'o ohin loron nia estatutu nu'udar arguidu seidaun hetan revogasaun tanba ne'e Gabinete Prokuradória-Jerál Repúblika iha papél importante atu asegura no defende legalidade tuir lei”, dehan Sr. Casimiro dos Santos, Diretór Ezekutivu Interino JSMP.

Mezmu Eurico Guterres hetan ona prosesu julgamentu iha Tribunál Adhoc Jakarta, maibé prosesu ne'e hetan kítika maka'as hosi entidade oioin iha tempu ne'ebá, tanba julgamentu ne'e diskonfia la priense padraun julgamentu justu tuir lei internasionál no prosesu ne'e rasik nu'udar esforsu no tentativa atu

disvia hosi ezijensia ba tribunál internasionál. Áte (Profesor David Cohen 2003), peritu famozu ida iha área direitus umanus lei internasionál no justisa tranzisionál, lansa krítika maka'as hasoru julgamentu kazu Eurico Guterres, no nia afirma katak julgamentu ne'e intensionalmente dezeña atu falla.

Embora ita konsiente katak ita iha difikuldade no dezafiu boot atu lori autór prinsipál no autór intelektuál sira ba justisa, maibé estadu tenke respeita vítima no sobrevivente liuhosi halo ho politika ne'ebé dignu no fó onra ba sira, atu nune'e labele hakanek sira nia sentimentu ba justisa. Politika ne'ebé Presidente Repúblika no Primeriu-Ministru inisia hodi konvida EG ho nia grupu ne'ebé envolve iha krime oioin iha pasadu la'os de'it ultrapasa limete Konstitusionál, maibé insulta no ofende vítima no sobrevivente sira ne'ebé terus no experensia tréjiku no nakukun iha pasadu. Rekonsiliaun labele representa deit, perspetiva lideransa sira iha ukun/poder, maibé tenke mai hosi vítima sobrevivente no povu ho povu.

Rekonsiliaun tenke sai nu'udar ajenda nasional ka ajenda estadu tomak, atu nune'e iniciativa hirak ne'e tenke liuhosi mekanizmu própriu ho envolvimentu entidade no órgaun soberanu hotu-hotu, partikularmente PN nu'udar reprezente povu nian tenke diskuti no aprova/ratifika antes Presidente Repúblika no Primeriu Ministru promove política ne'e.

Bainhira prosesu ne'e trata ho transparente no inkluzivu permite representasaun lian vitima sira nian iha prosesu hirak-ne'e. Tanba ne'e, iniciativa ba rekonsiliaun labele kria impresan hanesan iniciativa pesoal ka partikulâr hosi lideransa ida-rua nian ne'ebé agora iha poder. Asuntu estadu nian tenke trata tuir regra protokulár no solenidade estadu nian, atu asegura prosesu sira efetuada tuir orden no iha âmbito obrigasaun Konstitusionál.

Iha sumáriu relatóriu Chega! liuhosi Unidade Krime Painel Espesial ba Krime Grave fó sai katak Eurico Guterres nu'udar responsável no akuzadu ne'ebé envolve iha krime oioin iha período antes, durante no imediatamente depoisde referendum, ne'ebé inklui:

1. *Destruisaun ba propriedade hasoru populasan sivil ida, hahalok dezumanu sira seluk hasoru populasan sivil ida, oho ema na'in-neen no halakon ema na'in-6 ho forsadu relasiona ho atake hasoru Dioseze Dili iha lora 5 fulan-setembru tinan 1999;*
2. *Destruisaun ba propriedade hasoru populasan sivil ida no hahalok dezumanu sira seluk hasoru número deskoñesidu hosi ema sivil sira relasiona ho atake sira iha Kompaun Bispu Belo nian, Konventu Canossiana no Cruz Vermelha nian iha lora 6 Setembru 1999;*
3. *Hahalok dezumanu sira seluk hasoru individu ida relasiona ho atentadu hasoru Acação Riberio iha 6 Setembru 1999; no*
4. *Deportasaun obrigatoria ka transferénsia forsada populasan sivil sira entre lora 5 no 9 fulan-setembru tinan 1999.*

JSMP fiar katak autoridade Ministériu Públiku ka Prokuradória-Jerál Timor-Leste konsiente kona-ba kazu hirak ne'e, no tuir loloos ezerse ninia papél institusionál atu akonsella Presidente Repúblika hodi respeita no obedese ba ordem Konstitusionál.

Atu hetan informasaun kompletu favor kontaktu:

Casimiro dos Santos

Diretór Ezekutivu Interinu JSMP

Diresaun e-mail: casimiro@jsmp.tl

Telefone: (+670) 33238883 | 77257466

Website: <https://jsmp.tl>

info@jsmp.tl